

海上生明月 天涯共此时

——中华咏月古诗词集锦



八月十五夜月

唐·杜甫

满月飞明镜，归心折大刀。
转蓬行地远，攀桂仰天高。
水路疑霜雪，林栖见羽毛。
此时瞻白兔，直欲数秋毫。

中秋

唐·李朴

皓魄当空宝镜升，云间仙籁寂无声；
平分秋色一轮满，长伴云衢千里明；
狡兔空从弦外落，妖蟆休向眼前生；
灵槎拟约同携手，更待银河彻底清。

中秋月

唐·白居易

万里清光不可思，添愁益恨绕天涯。
谁人陇外久征戍？何处庭前新别离。
失宠故姬归院夜，没蕃老将上楼时。
照他几许人肠断，玉兔银蟾远不知。

八月十五夜桃源玩月

唐·刘禹锡

尘中见月心亦闲，况是清秋仙府间。
凝光悠悠寒露坠，此时立在最高山。
碧虚无云风不起，山上长松山下水。
群动悠然一顾中，天高地平千万里。
少君引我升玉坛，礼空遥请真仙官。
云幄欲下星斗动，天乐一声肌骨寒。
金霞昕昕渐东上，轮欹影促犹频望。
绝景良时难再并，他年此日应惆怅。

八月十五夜

唐·殷文圭

万里无云镜九州，最团圆夜是中秋。
满衣冰彩拂不落，遍地水光凝欲流。
华岳岳寒清露掌，海门风急白潮头。
因君照我丹心事，减得愁人一夕愁。

八月十五日夜

唐·裴夷直

去年今夜在商州，还为清光上驿楼。
宛是依依旧颜色，自怜人换几般愁。

十五夜望月

唐·王建

中庭地白树栖鸦，冷露无声湿桂花。
今夜月明人尽望，不知秋思落谁家！

天竺寺八月十五日夜桂子

唐·皮日休

玉颗珊珊下月轮，殿前拾得露华新。
至今不会天中事，应是嫦娥掷与人。

中秋待月

唐·陆龟蒙

转缺霜输上转迟，好风偏似送佳期。

帘斜树隔情无限，烛暗香残坐不辞。
最爱笙调闻北里，渐看星潋失南箕。
何人为校清凉力，欲减初圆及午时。

中秋

唐·司空图

闲吟秋景外，万事觉悠悠。
此夜若无月，一年虚过秋。

中秋月

唐·齐己

空碧无云露湿衣，群星光外涌清规。
东楼莫碍渐高势，四海待看当午时。
还许分明吟皓魄，肯教幽暗取丹枝。
可怜半夜婵娟影，正对五侯残酒池。

中秋夜登楼望月寄人

唐·戎昱

西楼见月似江城，脉脉悠悠倚槛情。
万里此情同皎洁，一年今日最分明。
初惊桂子从天落，稍误芦花带雪平。
知称玉人临水见，可怜光彩有馀清。

中秋月

唐·张祜

碧落桂含姿，清秋是素期。
一年逢好夜，万里见明时。
绝域行应久，高城下更迟。
人间系情事，何处不相思。

中秋夜玩月

唐·唐彦谦

一夜高楼万景奇，碧天无际水无涯。
只留皎月当层汉，并送浮云出四维。
雾静不容玄豹隐，冰生惟恐夏虫疑。
坐来离思忧将晓，争得嫦娥仔细知。

中秋月

唐·曹松

九十日秋色，今秋已十分。
孤光吞列宿，四面绝微云。
众木排疏影，寒流叠细纹。
遥遥望丹桂，心绪更纷纷。

中秋月

唐·裴说

一岁几盈亏，当轩重此期。
幸无偏照处，刚有不明时。
色静云归早，光寒鹤睡迟。
相看吟未足，皎皎下疏篱。

中秋月

唐·李洞

四十五秋宵，月分千里毫。
冷沉中岳短，光溢太行高。
不寐清人眼，移栖湿鹤毛。
露华台上别，吟望十年劳。

中秋月

唐·薛莹

三十六旬盈复缺，百年堪喜又堪伤。
劝君莫惜登楼望，云放婵娟不久长。

中秋月

宋·晏殊

十轮霜影转庭梧，此夕羁人独向隅。
未必素娥无怅恨，玉蟾清冷桂花孤。

陪友人中秋夕赏月

宋·王安石

海雾看如洗，秋阳望却昏。
光明疑不夜，清莹欲无坤。
扫掠风前坐，留连露下尊。
苦吟应到晓，况有我思存。

中秋

宋·朱淑真

秋来长是病，不易到中秋。
欲赏今宵夜，须登昨夜楼。
露浓梧影淡，风细桂香浮。
莫做寻常看，嫦娥也解愁。

中秋夜家宴咏月

宋·朱淑真

九秋三五夕，此夕正秋中。
天意一夜别，人心千古同。
清光消雾霭，皓色遍高空。
愿把团圆盏，年年对兔宫。

念奴娇·中秋

宋·苏轼

凭高眺远，见长空万里，云无留迹。
桂魄飞来光射处，冷浸一天秋碧。
玉宇琼楼，乘鸾来去，人在清凉国。
江山如画，望中烟树历历。

我醉拍手狂歌，举怀邀月，对影成三客。
起舞徘徊风露下，今夕不知何夕。
便欲乘风，翩然归去，何用骑鹏翼。
水晶宫里，一声吹断横笛。

月饼

宋·苏轼

小饼如嚼月，中有酥和馅。
默品其滋味，相思泪沾巾。

中秋登楼望月

宋·米芾

目穷淮海满如银，万道虹光育蚌珍。
天上若无修月户，桂枝撑损向西轮。

望汉月

宋·柳永

明月明月明月。争奈乍圆还缺。
恰如年少洞房人，暂欢会、依前离别。

小楼凭槛处，正是去年时节。
千里清光又依旧，奈夜永、厌厌人绝。

满江红·中秋寄远

宋·辛弃疾

快上西楼，怕天放、浮云遮月。
但唤取、玉纤横笛，一声吹裂。
谁做冰壶浮世界，最怜玉斧修时节。
问嫦娥、孤冷有愁无，应华发。

玉液满，琼杯滑。长袖起，清歌咽。
叹十常八九，欲磨还缺。
若得长圆如此夜，人情未必看承别。
把从前、离恨总成欢，归时说。

满江红·中秋

宋·辛弃疾

美景良辰，算只是、可人风月。
况素节扬辉，长是十分清彻。
著意登楼瞻玉兔，何人张幕遮银阙。
倩飞廉、得得为吹开，凭谁说？

弦与望，从圆缺。今与昨，何区别。
羨夜来手把，桂花堪折。
安得便登天柱上，从容陪伴酬佳节。
更如今、不听尘谈清，愁如发。

一剪梅·中秋无月

宋·辛弃疾

忆对中秋丹桂丛。花在杯中。月在杯中。
今宵楼上一尊同。云湿纱窗。雨湿纱窗。

浑欲乘风问化工。路也难通。信也难通。
满堂惟有烛花红。杯且从容。歌且从容。

人月圆·中秋

宋·赵鼎

连环宝瑟深深愿，结尽一生愁。
人间天上，佳期胜赏，今夜中秋。

雅歌妍态，嫦娥见了，应羡风流。
芳尊美酒，年年岁岁，月满高楼。

水调歌头·白发闽江上

宋·李弥逊

白发闽江上，几度过中秋。
阴晴相半，曾见玉塔卧寒流。
不似今年三五，皎皎冰轮初上，
天阙恍神游。
下视人间世，万户水明楼。

贤公子，追乐事，占鳌头。
酒酣喝月，腰鼓百面打凉州。
沈醉尽扶红袖，不管风摇仙掌，
零露湿轻裘。
但恐尊中尽，身外复何忧。